

Inatsisartut aamma Inatsisartut allaffeqarfiani aningaasartuutit tamanit takuneqarsinnaanngornissaat kiisalu kialluunniit paasiniaasinnaanngornissaa anguniarlugu Inatsisartut Suleriaasiata allanngortinnissaanut Inatsisartut Siulittaasoqarfia saqqummiusseqqullugu peqquneqarnissaanik Inatsisartut aalajangiiffisassaattut siunnersuut.

(Inatsisartunut ilaasortaq Randi Vestergaard Evaldsen, Demokraatit)

Akissuteqaat

(Inatsisartut Siulittaasuat)

Siullermeerinnineq

Siulittaasoqarfik sinnerlugu Inatsisartunut ilaasortamut qujarusuppunga aalajangiiffisassatut siunnersuummut.

Aallaqaasiutigalugu oqaatigineqassaaq suliassaq siunnersuutip saqqummiunneqannginnerani Siulittaasoqarfimmu Suleriaatsimulluunniit Ataatsimiititaliamut saqqummiunneqarsimanngimmat.

Siunnersuuteqartup kissaatigaa Inatsisartut Suleriaasianni aalajangersakkamik nutaamik ilanngussisoqassasoq, taamaalilluni Inatsisartut allattoqarfiatalu aningaasartuutaat suugaluartulluunniit paasitinneqarsinnaataaernermit ilaatinneqartussanngortillugit, kikkulluunniit periarfissillugit ingerlaavartumik taakkuninnga malinnaasinnaanissaminnut. Siunnersuuteqarnermut Inatsisartut aningaasartuuteqartarnerata sapinngisamik ammanerpaanissaata qularnaarneqarnissaanik nalinginnaasumik kissaateqarnermik tunngaveqarpoq.

Aallaasiutigalugu oqaatigineqassaaq Inatsisartut ukiumoortumik nalunaarutigisartagaanni Inatsisartuni aningaasaqarnikkut pissutsit pillugit paasissutissat sukumiisorujussuit ilanngunneqartareermata. Tassuuna angalasarnernut aningaasartuutit, avataaniit sullinneqarnermut atuinerit, ilassinninnernut aningaasartuutit, sulisoqarnermut aningaasartuutit il.il. pillugit paasissutissat innuttaasunit Inatsisartunillu ilaasortanit takuneqarsinnaasarput. Tamanna pissutaagunartut ilagivaat Siulittaasoqarfik allattoqarfillu qinigaaffinni kingullerni aningaasatigut pissutsinik paasitinneqarnissamik qinnuteqaatinik, tamarmillu akuerineqartartunik, ikittuinnarnik tigusaqartarsimaneranik.

Malugeqquneqassaartaaq Inatsisartunut aningaasaliissutit naatsorsuutillu ukiumoortumik aningaasanut inatsisikkut saqqummiunneqarlutillu Nunatta Karsiata Naatsorsuutaani takuneqarsinnaasarmata.

Iisimaneqartutut pisortat ingerlatsinneranni suliat pillugit paasitinneqarsinnaatitaaneq pillugu Inatsisartut inatsisaat Inatsisartut suliffeqarfiutaannut atuutinngilaq.

Iisimatitsissutigineqarsinnaavoq tamanna aamma Danmarkimi atuummat, paasitinneqarsinnaatitaaneq inatsimmi pisoqqami nutaamiluunniit Folketingi taassumalu ataani suliffeqarfiit ilaatinneqaratik. Tamatumunnga tunngaviuvoq nunatsinni Danmarkilu paasitinneqarsinnaatitaaneq pillugu inatsisit taamaallaat atuummata pisortat ingerlatsinerannut toqqaannartumik innuttaasunut sammisunik pisortat suliassanik suliarinnittarnerannut. Taamaattumik inatsit malittarisassatut pingaarnertut taamaallaat atuuttarpoq suliassat pisortat ingerlatsineranni oqartussanit aalajangiivigineqartussat suliarineqarnerannut. Inatsisartut taakkulu ataanni suliffeqarfiit taamatut aalajangiineq ajorput, pissaanerup pingasoqiusamik avinneqarsimaneranut nalinginnaasumik najoqqutarineqartut naapertorlugit.

Allatut ileqquliussanut assersuutitut ilisimatitsissutigineqarsinnaavoq Sverigemi toqqaarneqarsimammat qitiusumik, nunap immikkoortuini najukkanilu naalackersuinikkut oqartussat qulliunerusut nalinginnaasumik oqartussanut naligiississallugit, taamaattumillu Sverigemi inatsisartut Rigsdagi paasitinneqarsinnaatitaaneq pillugu malittarisassanut arlalinnut ilaatinneqarluni.

Finlandimi inatsisartut Riksdagi Finlandimi paasitinneqarsinnaatitaaneq pillugu inatsimmut ilaatinneqanngilaq, Riksdagilli allattoqarfiat ilaatinneqarluni.

Norgemi inatsisartut Stortingi toqqaannartumik paasitinneqarsinnaatitaanermut inatsimmut ilaatinneqanngilaq, Stortingilli akuersissutigisimavaa paasitinneqarsinnaatitaanermut inatsit atorineqartassasoq Stortingip allaffissornermut atatillugu allagaataanik paasitinneqarnissamik kissaateqartoqartillugu.

Inatsisartut taakkulu ataatsimiititaliaasa kiisalu pissutsit Siulittaasoqarfimmut, taakkulu aningaasartuutaannut, tunngasut pillugit paasitinneqarnissamik qinnuteqaatit nalinginnaasumik ullumikkut akuerineqartarput inatsisitigut aalajangersakkanik tunngaveqarani, tamannalu pisinnaagaangat tatigeqatigiinnissaq Inatsisartut naalackersuinikkut sulinerata ilagilluinnagaa naapertuuttumik isiginiarlugu. Iisimatitsissutigineqarsinnaavoq Folketingip Siulittaasoqarfia taamaaqataanik suleriaaseqarmat.

Siunnersuuteqartup kissaatigaa suleriaaseq atuuttoq tamanna Inatsisartut suleriaasianni malittarisassiuunneqassasoq, taamaattorli kissaatigineqarluni Inatsisartut

anigaasartuuteqartarnerat kisimi malittarisassanik allannguinnermut tamatumunnga ilaatinneqassasoq.

Siunnersuuteqartup oqaatigaa siunnersuut naammassineqarsinnaasoq Inatsisartut anigaasartuutitut uppersaataasa tamarmik ingerlaavartumik Inatsisartut nittartagaatigut saqqummiunneqartalerneratigut imaluunniit pissutsinik taaneqartunik paasitinneqarsinnaatitaanerup inatsisitigut aalajangersarneqarneratigut, taamalu qinnuteqaatit taamaattut ingerlaavartumik Siulittaasoqarfimmit aamma/imaluunniit Inatsisartut allattoqarfiannit suliarineqartariaqartassallutik.

Inatsisartut siunnersuut ilalerusussappassuk periarfissaq kingulleq ulluinnarni sulinermi aqukkuminarnerpaassaaq.

Siulittaasoqarfik ataatsimiinnermut ingerlasumut inatsisissatut siunnersuutunik ataatsimoortunik siunnersuuteqarpoq, maanna Inatsisartut Ataatsimiititaliami suliarineqartunik. Siunnersuut manna Inatsisartut tapersersornartissappassuk, pissusissamisussaaq suliaasaq Inatsisartut Ataatsimiititaliap suliarippagu Siulittaasoqarfiup inatsisissatut siunnersuutaanik ataatsimoortunik suliarinninnerminut atatillugu.